

四庫全書

集部

欽定四庫全書

集部
魯齋集卷二

詳校官庶吉士_臣李傳熊

主事_臣呂雲棟覆勘

總校官庶吉士_臣朱 鈐

校對官侍讀_臣王家賓

謄錄監生_臣范 鍾

欽定四庫全書

集部四

魯齋集

別集類三 宋

提要

臣等謹案魯齋集二十卷宋王柏撰柏好妄逞私臆竄亂古經詩三百篇重為刪定書之周誥殷盤皆昌言排擊無所忌憚殊不可以為訓其詩文雖亦豪邁雄肆然大旨乃一軌于理宋史儒林傳稱其少慕諸葛亮之為人

自號長嘯年踰三十始知家學之原

案柏之祖師愈

受業於楊時其父瀚亦及朱子呂祖謙之門故史文云然與其友汪開之

著論語通旨至居處恭執事敬惕然嘆曰長

嘯非聖門持敬之道亟更以魯齋蓋其天資

卓犖本一桀驁不馴之才後雖折節學問以

鎔鍊其氣質而好高務異之意仍時時不能

自遏故當其挺而橫決至於敢攻孔子手定

之經其詩文雖刻意收斂務使比附於理而

強就繩尺時露有心牽綴之迹終不似濂溪
諸儒深醇和粹自然合道也特其勇於淬礪
檢束客氣使縱橫者一出於正為足取耳集
中第一卷有壽賈秋壑詩極稱其援鄂之功
諛頌備至是亦白璧之瑕然核檢諸書均不
載其有依附權門之事不知何以有此作其
集乃明正統間柏六世孫四川按察司僉事
迪所重編又不知何以載之集中畧無所諱

均不可解疑以傳疑存而不論可矣乾隆四十五年二月恭校上

總纂官臣紀昀陸錫熊臣孫士毅

總校官臣陸費墀

原序

孔子曰禮云禮云玉帛云乎哉樂云樂云鐘鼓云乎哉
文之為文關乎道也古之聖賢得時行道若堯舜禹湯
文武之為君皐皞稷契伊傅周召之為臣善政嘉謨載
之方冊夫是之謂文或聖賢之徒不見用於時窮極天
人之理攷古帝王經世之道若孔子而下顏曾思孟刪
定著述開示後世夫是之謂文是皆不倚於物而能與
天地日月同悠久者係乎道也下逮戰國能言之士各

以所見立為議論或戾乎聖賢之道者君子有所擇焉
漢唐以下代有作者揆之於道醇乎醇者殆亦鮮矣宋
濂洛關閩諸君子出然後性理之學天開日朗學者有
所依據文章議論一歸於正道之明也辭則存乎人也
金華王文憲公天資高爽學力精至以其實見發為文
章足以明道德使其見用足以建事功而卒老於丘園
惜哉若其詩歌又其餘事也六世孫四川按察僉事迪
裒而成帙義烏縣正廬陵劉同丞鄱陽劉傑政有餘力

用鋟諸梓其亦知所用心者哉南郡楊溥序

欽定四庫全書

魯齋集卷一

宋 王柏 撰

賦

宋文書院賦

蔡子明講於鵞湖用文公白鹿洞賦韻示學者以墨本
見寄因用韻和之

繫奎躔之珠粲闡文教於無疆涵累朝之樂育萃慶厯
元祐之忠良雖陽九之震蕩復王氣於錢塘鴉有時而

號畫鳳終翺於桐岡抑理大之矢謀達此道於八荒錫
書堂之四號揭儒隱之遺芳因宏規而恢拓立郡縣之
膠庠發天地之清淑導濂洛之洋洋自龜山之復南開
太宗之世運繹分殊之一語極精析而莫渾彼憑虛而
夸毗忌所蔽之難遁盛哉乾淳之大儒四合朋簪而辨
問有味性質之異同惡此知行之並進蓋入德之有序
孰先傳而後倦此紫陽之學之為無弊所以紹龍門之
適孫合萬殊而一統黜百家之異論睽鷺湖之古剎寓

昔日之琴書鎖淒涼之歲久堙切磋之舊模偉膚使之
絕識攬六轡以爰諏新黌序之壯麗儼衣冠之進趨坐
臯比而振鐸啓襟佩之良圖乞題表於天陞聘師範之
勤渠邀綵衣之歸騎肅真謁於前除賡先覺之古韻著
後學之貞符羌予隱約於陋巷忽拜駢珠之華集恨車
輪之生角望室堂而莫入粗識為學之為已何敢罷之
而口給幸羣經之粲然盍遺音之細緝願言忠告於我
人請絕時學之陋習惟窮理與居敬要此志之先立咏

洞賦之末章矢一心之允執既爾的而爾張亦何勞於
決拾亂曰玉不事彫琢曷成爾璆兮木不就規矩曷正
爾樛兮曰明誠與敬義於以泳游兮志所志學所學亦伊
顏之流兮慨往哲之不作何以解憂兮矧明訓之具在
它又何求兮

寶婺新樓賦

炯乾象之輶輳兮麗元運而不息殷七政之後先兮表
輝曜之清則謂四星十有一度兮獨司女職剪帛裁繪

兮供衮衣之黼黻問機杼之友兮隔河漢以相望御真
氣之皎皎兮籍人間之陰陽卻綵藻而衣青雲兮製白
蜺以為裳玕璫深杳兮德彌彰姓爾國兮湯沐据地勢
之曠遠兮潔神宮之穆穆皇靈靈而來下兮瑤席而瑱
玉絕塵囂兮夜氣肅勝千嶂之相繆兮東南最佳架脩
梁而承宇兮豁往古之壯懷自家令之著句兮意俗而
辭俳雙溪灑灑兮流恨無涯當其出守兮腰猶未瘦昧
於榮利兮不償厥售夢回劒舌兮史有餘臭吁嗟乎赤

章兮終莫宥紫志兮重瞳篤學兮博通一念差兮百智
窮八詠八詠兮胡為乎樓中士生斯世兮莫先乎器識
富貴不可苟求兮聲名不可以虛得孰有不養而成兮
不耕而穡所以設為庠序兮綏猷而明德大厦渠渠兮
有赫泮宮像闕里之森嚴兮巍巍乎樓之東山川斯拱
兮清淑斯融藹圭璋兮叩叩顯顯時習兮矻矻日邁兮
志奪安得方寸之清明兮人欲絕與君來此兮吟風弄
月亂曰風月常見兮景常新清明光霽兮胡為而異名

存爾天兮不昧湛一氣兮孔神與風月兮無愧斯能評
古今談今

冰壺秋月賦

子男列爵兮國有常居襟三洞而帶雙溪兮分女宿之
墟誰作燕坐之室兮有扁冰壺相爾室之耽耽兮是敞
是虛主乎中兮志趣萬殊孰有甘心乎冷淡兮詩書之
癯求名義之凜凜兮斯焉何取或無所為兮又何足以
為觀省之補彼東風之蕩無檢束兮物物是與夏日亦

長且舒兮有酷斯暑氣象不我侔兮耻焉爾伍冰壺冰
壺兮一以清有月有月兮秋更明清明相涵兮璀璨光
晶極表裏之透徹兮煥采凝瑩彼君侯之心兮鑑空衡平一寒
自力兮千室自春朱絲鼓兮澹和畫簾垂兮暇整俛焉
撫字之勤兮不計歲月之道緊西風生兮遠林白露斂
兮煩景穀壁有餘最兮猶從容待秋之一稔豈不懷歸
兮去爾民之未忍眇扁舟兮家具表遺愛兮旌旗行行
青雲之步武兮廉德久簡於上知念世道之已熟兮此

為何時聚斂慘於盜賊兮甚東南之瘡痍傾倒瞑眩之
劑兮勿留刀圭既無欲以揜其剛兮仁必有勇飲蘭露
而餐菊英兮豈富貴之能擁惻有隱於民瘼兮不知震
霆之可恐人懷襟度之寬兮我覺丰神之甚聳蓋任重
道遠之士兮聲色凝然而不動我非有風鑑兮察所安
之甚精見公雖踈兮知公獨深畏此簡書兮勢不得而
日親鳶魚同一天兮各適其情人生聚散兮如太空之
浮雲少歌曰今人薄交誼兮古重離別人合有離兮月

圓有缺人別不易見兮南轅北轍彼月之缺兮或團團
乎林樾安得長官兮甘公如處處冰壺兮貯秋月

喜雨賦

己丑之秋七月將望長嘯與客命駕經從於南山之下
農人告予曰兩月不雨驕陽盛熾傷禾稼之就槁竭陂
塘而莫溉溝澮涸草木病瘁渺一飽之末期斂雙眉
而墮淚長嘯愀然歸而與客曰四海蒼生望霖雨不知
龍向此中蟠此非王金陵之詩乎想新法之紛張瞻青

苗而色沮澤民之事業如是乎金陵之所謂霖雨猶今
春之淫潦所以基後日之禍也當其太空潑墨雷奔電
掣溪原為一桑麻冒沒菌衣生於用器蛙蚓行乎几席
麥欲秀而泥蟠蠶正飢而葉濕牆壁苔穿鶯花狼藉於
是足沈礎潤之氣衣費香篝之烟望元雲之缺鬱慨沈
穡之永歎何斂散之失時奈盈虛之大權而乃異二閑
戶阿香熟眠魃鼓舞於煩世龍深潛於九淵幸玉清之
悔禍遣六丁而下觀翕炎煦畢疏河浚泉祝融斂跡而

退避屏翳振馭而著鞭長嘯不寐側耳而聽初淅瀝而
萃蔡忽砢砢而奔騰如猱風兮入溝壑如怒潮兮來海
門又如百萬慄悍之衆銜枚赴敵而戈甲夜鳴滴馬鬃
於李靖洗牛背於鬱林點滴瓦溝兮有碎玉韻建瓴屋角兮
有瀑布聲激竹溜之宮徵煥花徑之精神自是渴者澤
仆者起枯者沃華者成如沈疴之遽脫如亂邦之中興
又如光弼入子儀之軍一號令而旗幟鮮明化彫瘵而
豐裕消愁歎而歡忻一點一穀如坻如京童子不識秋

事之可慶但喜新得涼於戶庭也長嘯於是誦孟氏勃
興之語賡詩人有年之篇獻於太守太守不有歸乎天
子天子謙謙功不敢專讓於皇天皇天冥冥不得而名
本大德之好生也歟

四言古詩

疇依

元會開物風氣渾龐聿生神聖惟包羲皇始畫八卦人
文炳煌大道之書誰云已亡

巍乎大哉堯之為君其仁如天其知如神鑿井畊田出
作入息擊壤而歌不知帝力

虞舜側微重華協帝父頑母嚚烝烝以乂天理之極人
倫之至恭己當天雲行雨施

禹乃嗣興載平水土天錫九疇舜倫攸叙克儉克勤不
伐不矜有典有則貽厥子孫

昔在帝堯咨舜一語允執厥中舜亦命禹危微精一義
復兼舉三聖授受獨臧千古

湯聘莘尹五進就桀天命人歸鳴條自葛以義制事以
禮制心日新厥德鑑此盤銘

於穆文王順帝之則身蒙大難小心翼翼三分有二以
服事殷可謂至德萬邦儀刑

武王達孝善繼善述盟津既誓干戈載戢訪於箕子洪
範以陳惟皇建極反覆丁寧

於皇周公勤勞王家赤舄几几德音不瑕思兼三王以
施四事坐以待旦制作大備

生民以來未有孔子金聲玉振始終條理五經之道天地同流立此人極萬世東周

賢哉顏子好學獨稱既竭吾才欲罷不能不貳不遷庶乎亞聖一簞一瓢不幸短命

曾子雖魯纖細不遺吾道一貫以魯得之易簣得正手足斯啟仁為己任死而後已

至哉子思憂道失傳推本遺訓中庸一編提挈綱維開示蘊奧無聲無臭孰窺其妙

惟孟軻氏雄士絕識伯仲禹功力距楊墨性善養氣前
所未聞歷選諸子實醇乎醇

聖道不行自周公歿聖學不傳由孟子卒上無善治下
無真儒章句訓詁煨燼之餘

皇宋文明周子天畀不由師傳道體默契建圖屬書以
覺後覺上接洙泗下開河洛

歷紀明道祥應兩程吟風弄月有的其承體用一原顯
微無間惠我光明如夜復旦

於時張子崛起關中虎皮端坐多士景從瞻彼洛矣道
溥所宗訂頑揭牖表表正蒙

恭惟道統一絕千載何絕之久何續之易師友之盛東
南洋洋曰尹曰謝曰游曰楊

迪予朱子理一分殊汎掃淫詖煌煌四書有析其精一
字萬鈞有會於極萬古作程

流澤未遠口耳復迷纂組斷碎倚託媚時大本斷喪擾
擾胡為淵源微矣予將疇依

右二十二章章八句

冽井

冽彼井泉蓮華斯名有美一人於焉載沈夫也不二昊天曰明父母愛我曷慰我心

冽彼井泉蓮華其號有美一人於焉是蹈琴瑟既合載言載笑父母不允中心悼悼

有冽彼泉絃歌之東所謂伊人宛在其中我心既得皇恤我躬匪一死之義之從容

有冽彼泉在絃歌內所謂伊人之死靡悔人孰不死我
無昧昧是心之存炯千萬載

冽井四章章八句金華胡氏女既嫁矣夫不
良父母奪之欲更其偶五年不許白於令尹
進而問焉曰理無二夫令尹義而歸之父母
怒從夫三日赴井而死國人憫之而作是詩
也

五言古詩

和立齋對菊二歌

秋至百芳歇籬邊佳色團遙思古節士愛此黃華蕃我
生千載下恨不相同看叢叢夜氣厚曉葉千珠溥中表
自芳潤對花發長歎真固非素積動色形豆簞悠然露
真意猶云欲忘言淵明一寸心細嚼供晨餐

之子歌遠遊征車事奔逸歸來東籬下一洗四方色靜
觀草木蕃若不與人力苟無浸灌功造化庸有忒今年
秋苦旱五穀廢嘉殖梅化竹亦焦枯芝槁蘭茁一朝去

卷一
酷吏甘雨解衆惑天人本無間喜氣滿城集奈何倉廩
虛一飽竟難得不如菊花乾醫方賸稱述

和暘谷春郊韻

一春風雨多連日幸開霽清尊酬芳菲嘉約起予意
邁溪南國樂只群英萃徘徊曲逕迂老蹕尚堪企竹修
君子容花向少年媚俯挹百草香尚友萬山翠往事動
深感高譚出中祕莫色排空來一笑散襟袂不有短長
吟寂寞此風致

用玉成韻題秋臺詩卷

杳杳南風琴洋洋大雅音復古心未古難以筆力任秋
臺千古調淵乎樂不淫天然絕瑣飾無非情性吟掩卷
三歎息式如玉與金

夜觀野舟浩歌有感

康衢久寂寞擊壤音微茫南風啟簫韶拜手賡明良周
衰二雅廢鳳兮歌楚狂楚狂已再變三閭竟哀傷俯仰
千載後嗟嗟情性荒梁選尚遠思淵明粹而莊開元生

李杜我宗推蘇黃宗派亦淪墜紛紛師晚唐吟骨不溽
古記魄不自強雕鏤心肺苦何曾徵宮商濂翁著和澹
感興開紫陽紫陽尚六義六義興已亡鄭衛日盈耳水
炭攪我腸章貢有奇士野舟刊名章古城夜酌句正義
尤洋洋游談到魏蕩百世流遺芳

贈仙山剛公新創香林

佛說菩提泉其性本澄澈人乃無蕪穢誰能還瑩潔我
觀浸碧泉泓渟貯芳冽恰如老師心風止雲跡滅憶昔

著詩句無乃太疎拙彈指二十年相看頭已雪老師闢
新軒眼方頗虛澈得得穴山竇一脉引幽絕清泚貫花
徑冷暖資衆啜一動一以靜誰盈復誰竭水性本不殊
地勢差有別即此兩水間盡是廣長舌學子來問話當
以無說說但見香林香薰蒸千萬葉

宿寶峰呈玉澗

默成已仙去北山久寂寞豈無愛山人時時訪林薄心
境不相當丘壑自丘壑誰知百年後秀氣終有託的的

盤溪孫精光發河洛神龍躍天津鞭霆駕飛電相逢玉
澗翁筆底銀潢落江湖四十年萬象恣搜摸從游八九
子天才皆卓犖漲起十八灘曹溪原一勺愧我局陋巷
瓢簞粗知樂遙望詩壇高勢與芙蓉角掩旗仆金鼓不
敢事攻畧弔古得名勝盟府定虛爵派長竟先歸白雲
冒南岳

牧歌寄謙牧翁

山前牧羊兒群羊化為石山後謙牧翁雙牛挂虛壁仙

佛道不同妙處各自得
我來牧坡上牧翁已牧出風行
麥浪高日暖柳陰直沙平草正軟
隔林數聲笛試問翁
牧意著鞭還用力牽起鼻撿天蹋地
四蹄實渴飲菩提
泉飢來噉芻苢步行顛倒騎神光
背上射因悟角前後
通身白的皤勿使蹊人田
母乃失其職舍策脫蓑歸人
牛兩無跡

天基節雨有感

歲歲天基節晴和萬國歡
今年侯國宴疎雨忽潛潛
允

矣天人際機緘妙已宣聖心方感慕雲意慘天顏誰識
天倫重端為萬化原一時名未正事事盡拘攣父母惟
生繼昭昭大義存節文斯二者此外豈容干在昔權臣
謬區區欲怙恩私心崇義斷強抑所當尊近日劬勞報
猶云厚薄嫌一言誰誤主孝道未純全此事書青史千
年不可刊勿云今既往熟視所難言父母人皆有何稱
考叔賢只將誠意感各盡此心天

壽潘介岩

寶祐重頒歷祥開甲子三一分春色滿喜溢壽卮寬去
歲霑餘慶連宵飫豆籩今年東望處紫氣護天關正值
松椿祝難忘契誼覃只將生硬語便作辦香看天不生
賢數人培厚德難幾年涵養力方到介而安出處隨時
義從容最可觀青雲平步進中立了無偏一解星屏綬
扁舟歸故山修門無一字已決此身閒卜築遷新宇除
書動笋班勤渠朱邸講公論藹朝端善類頻回首爭先
俟奏篇忠嘉當有力聖德本天涵

金匱要略卷一
和立齋書懷二首

病暑已成痼塵埃凝簡竹蕭蕭北窓下閉門哀梵獨曜
靈欲西邁風露浣心目仰觀牛女星相望明河曲誰能
却鳳凰共此驚雞逐美人天一方郵音空往復寥寥明
月懷翳翳談間玉歡喜聞歸期繫彼白駒谷幸自有長
林尚可停鸞鵠

平生景風操慷慨懷賦竹恨無百畝地相與種黃獨只
有滿架書可寄千古目何敢偁規矩周容競追曲彼不

見泰山政以鹿斯逐子酌芝山泉天運兩回復應感鶴
鳴章聊以石攻玉遷喬豈不佳歲寒須入谷天地何方
圓吾將叩歸鵲

小酌敬岩梅下和立齋韻

化工忌慘舒但起姑息念一冬漏陽和未識六花片屈
指不十日冉冉歲華禪我聞敬岩下梅英照清淺尊酒
酌嘉友薄批明月薦披圖論人物行子戲角戰回首九
君詠清賞恨疎遠從今莅新盟談笑恣雄辨多藉冰雪

章細澡塵埃面歲歲臘殘時檢舉舊公案

又

平生手種梅不作和羹念其所起予者歲寒心一片孤
芳以氣傳萬物自形禪暗香疎影句知心亦已淺雖以
乾蓀餘亦可清廟薦今年花最蚤思之心膽戰花蚤豈
不佳當開時尚遠陰陽貴順序難與俗人辨我豈事遠
觀急欲識春面此意與誰論珠璣謾堆案

書隱和韻謝再答之

我已百念灰只有敬賢念事之云乎哉敢分席半片不
思笙鶴隨猶望衣鉢禪舉杯邀杖屨同問春深淺徘徊
梅月下不嗔蘋藻薦公詩太過情置我冰而炭年來從
公遊琴瑟幸非遠一謙生萬和一默屈大辨今日知公
心他日識公面朝夕願趨隅稽首侍香案

和立齋芙蓉觀三十韻

我觀神仙傳詭幻何紛紛或生歆慕意方士爭愚君政
徹既多欲仙材隔幾塵澄神黜麤穢有時緇黃庭年少

不我待日月斯邁征含霞飲沆瀣聊助神氣清何須超
大壑濯髮晞崑崙天道有常運過化續者新長生非受
命莫使邪念興澹然養至德自可康顏齡古今共一理
萬法同一心世事互起滅反覆如碁枰赤松事黃帝至
今何不泯安期干楚羽對奕非邪真徐公何為者得得
捫蘿尋惆恍紀一夢浩不知涯津馳神上無極竭思下
無垠長吟追去古抗論貽來今於我政無益默計空辛
勤不如素心友相與尊舊聞聖道無隱顯人心有晦明

正論歎剝蝕危如線一綸舉世闔月窟何人開天根浮
華正皤皤元氣方堙淪毋起遠游念而起凡子評為學
有精要莫作隔壁聽淵源祛滯吝德義開胸襟毀譽何
足問死生何足論飢食渴而飲願為堯舜民

和伯兄新竹韻

叢竹太踈踈一鞭忽伸脚穿石作斜勢朝宗意穆若片
綠吐新梢員粉露殘籜今年造化深稚子六七作群居
不嫌密獨步豈疎畧是為石笋瑞不負歲寒約清標凜

三友有倡不予酢誰與共栽培莫至風聲落懷古不成
寐傷今政作惡縱有題詩人人面定非昨

和立齋荔子樓韻

我久抱離索加之憂患薰血氣日以耗話別難為情之
子行邁邁征車從仁兄閩嶺在何處目斷遮行雲素

闕

播芬郁丹荔嘗鮮新重樓一以眺千古垂桴心海風駕
空來徘徊振書襟遙知意軒豁塵袂何由親惟有清夜
夢栩栩踰南岑曜靈倏西邁剥啄來嘉音見書如見面

瑰詞龍魚鱗朋友正歡慰喜氣騰家林呼童烹露芽
眼時一斟是中有雋永透入肝腸深

和敬岩韻迓其歸

生涯魚上竿世事鼠入角民膏既煎熬民髓復椎剝上
下急交征絕口政與學孔明痛桓靈厥德修罔覺自古
辱與疎其機在一數歸來有嘉士尚可理商榷駕言一
寸膠救彼千丈濁精意自入神端可鼻端斲趙孟自貴
賤玉女皆天渥如彼角斯磋如彼玉斯琢不患工不浚

所患志不恪秋陽日以暴江漢日以濯真積而力久自
見所立卓庭前梅粲粲梅下石确确雲飛川泳間俯仰
自不惡獨立萬物表誰能伍齷齪雨露懋蕭艾霜風妬
荃葍天意孰云遠鑑此歸意確寄言順應人大公一以
廓

效希夷和陳北溪韻

北溪真有道出語涵芳鮮覺彼群迷句真與梅爭妍一
花一太極獨立形氣先逋仙名浪得未必知其然

甚矣天地閑獨有一花鮮未論色之潔未論香之妍只
於冰雪中誰占生意先萬物心自服敢問何能然

和立齋宿友韻

吾儕有何樂同志味自長天高與地下參我人中央痛
掃物欲蔽放出元明光力學日不足游宦那可長山人
睽間久歲晚歸南荒會友魚貫臥展轉幾異床老我失
此快獨卧風雨牕回思少壯時此味曾親嘗白髮真可
愧觸事方面牆喚醒舊時夢吐哺歌新章

高風行懷本齋

人皆喜君出我獨喜君歸君出豈不媿事業生光輝君
歸亦不惡風味高一時人才有消長世運有盛衰公論
不可泯隱顯觀妍媸隱者未必是顯者豈皆非遁世愧
無悶貧賤不可移得時必行志斯世相網維無悶是在
我行志非可期一處特易易一出真難持利欲政滔天
四海皆瘡痍世俗所榮者君子方鄙之君開青雲步要
津夫何疑手揮體國略口訥阿世詞長揖群玉府拔足

逸阱機黃鶴已高舉
壺盞喧醺雞咎雪有清泚一洗京
塵緇故舊述間濶松楸慰時思
蘭茁濯庭下菊蕊黃東籬酒熟
蟬螯健橙香鱸膾肥至哉天下
樂何須卿相為解我橐中書極
深更研幾聖門八字開廣大涵
精微或參華山席先天探包羲
或巾高陽車同載膝上兒苟足
經世具小需時運宜天意欲平
治當今非吾誰

和立齋橘花韻

梅花已仙去草木同猶薰萬物競妖冶
二氣勞氣氤氲南

服有橘隱春風罔知聞濃露浥清曉落月籠夜分玉圓
太極判蚌合開天真芬芳滿宇宙那肯媒東君

再和適莊韻

客從東方來喜甚屐折齒鼎烹石乳精談笑秋月裏中
有八十翁宴坐維摩椅遁澤瑚璉罷玉璫間疊洗立齋
持脩綆汲汲古井水參也魯依然商聲從曳屣翹首諸
俊遊霹靂燒蛇尾雙鸞輝九苞翩翩奮棲枳桐陽有卧
龍共蹋風雲起翁當沽美酒魚鼈膾錦鯉

送立齋入閩哭久軒

雙溪秋氣深送子臨古道古道如掌平四顧行人少行
行復行行向日度南嶠故人今已矣未必死非好世事
浩無涯愁雲黯江表

壽秋壑

皇天分四序春生而秋成春風渙九野秋氣呈清明萬
物一以實物物含生生我公秉元化全體涵金晶義概
包宇宙智略吞群英五行互相制自昔誰去兵代馬飲

江水赤鳥司專征神謀運玉帳靈旗繞氈營鞬鞞鞅鞞
備廣距甄角精殘醜肝膽破束手祈受盟肅肅荆楚淨
湯湯江漢清東西亘萬里齊民競春耕歸來輔皇極一
稔舒群情翼翼周鼎重疊疊宸慮輕前星耀垣象德星
萃神京旂常偉實紀前史辭虛聲當此秋正中角亢迎
長庚於赫袞繡瑞綿綿綵綬榮玉露滴鳩鵲珥貂宣寶
觥陛下千萬歲與公同太平

送希夷之江西

小雨斂輕塵秋聲壯亭驛驅車過南浦別懷徒縻積世
道一以壞為善不自力一朝魯兩生為人作行色后山
薄命篇竟不待它日送子行復行一步一歎息誰知離
索悲有甚萬鍾失此事已忘言此情未能釋有時誦吾
句或為千里益

秋熱

西風不力征老火未甘退蟬聲亂耳煩癡蚊健姑嘬一
雨洗天來不復有故態天序自分明人心其少耐

和立齋蹋月韻

我觀天壤間何處無此月對月兩心同正自欠此客月
清人更清心景兩相迎平生負此約鬢影今星星我有
一句話願與月同盟清光無晦蝕與德時時新

和叔綜禽聲放言

天以鳥鳴春鳥聲不敢止天以人鳴道斯人其可已爾
鳥固無知喧啾亦何利鼓弄枝頭晴濶翻林外起不學
九臯鳴聲聞何止此不學千仞翔一鳴來瑞世古以鳥

名官列職有理致只有歸去兮陶公不爾愧人豈不如
鳥鳴則震天地不鳴千聖傳則鳴千古事詩翁莫浪鳴
文武道未墜

和寬居見懷韻

北望戲馬臺荆榛滿中路英氣一何多懷古渺難泝山
河腥日月虎豹沐雨露纍纍楚猴冠異哉天所賦豈無
濟川才淹留秋又莫清風從何來洒洒定吾故贈我金
琅玕鑒落雙魚素

佳菊何青青寂寞籬之東濁醪二三友一醉涵鴻濛
懷陶靖節邁邁無遺踪誰知千載下譜入處士宗
我生亦已晚百拙勞化工上無學古心下無適俗容
聊自樂其樂君子固有窮

赤松即景

平生百慮懶尚有丘壑心佳哉二三友軟盟同幽尋
壯懷豁虛曠元宮窮邃深時方釀薄暑萬綠張雲岑
新篁凝粉翠日影篩碎金瘦筇扶野步羽扇搖清吟
漱齒掬

清泚雪瀑開風襟脫巾掛琪樹露頂涵重陰山禽自在
語山醪隨意斟物外轉栖碧二亭名石險蒼苔侵路窮不
可去半山聞語音山路未為險世路尤巖巖何時侶麋
鹿結茅入深林

和葉聖予山中韻

赤脚忙晨炊掉臂會清招相如僮御盛浩然韁轡調遙
指白雲邊乘興尋夷巢古殿金碧悄元冠綵翠銷恠石
壯熊卧老樹蟠龍腰清陰團野色習習生涼颺懸岵斜

斷處槎木成飛橋刺膚起霜暈小小飛蚊驕日長詩思
渴香冽供山瓢清狂驚四座浩氣摩丹霄書岩苔礎筆
題葉攀柔條語默任人意無庸發輕嘲

和前人小桃源韻

二初何如人夫豈古隱士道成邈沲寥羊卧不再起鸞
鶴舞松聲蕭騷快心耳金竈清塵生餘丹不輕委我來
桃源游直窮路所止飛蘿搖春烟素雪噴清泚了無一
根枕此名安可紀豈是牧羊兒即劉阮二子不然命名

者亦別有深旨何時駕草堂深入此山裏翛然逸世慮
鍊魄繼遐軌

題砥齋

古劍蟠雙螭瑞景騰豐城耿耿涵義氣凜凜無俗情塵
世三十載世事嗟冥冥當道舞狐鼠白晝嘯山精秋風
清夜發匣內鏗然鳴故人耿介士有砥靜且平寄語善
持保功用真難輕莫授刀錐銛耗蝕徒歆傾許我礪英
芒一抹霜花明北掃京洛暗南擊猩鼯腥彈缺倚霄漢

掌
上
風
雲
驚
物
莫
不
有
時
今
非
人
能

魯齋集卷一

欽定四庫全書

魯齋集卷二

宋 王栢 撰

五言律詩

代壽忠王

高宗皇帝生於丁亥與藝祖皇帝聖誕之歲同
孝宗皇帝生於南渡之初元丁未光宗皇帝生
於丁卯是時益國公周必大和東宮之詩有云
一丁昌火運三合聚皇家以為仙源衍慶之符

既而寧宗皇帝生於戊子今皇帝陛下生於甲子而大王殿下又生於庚子甲戌庚命書謂之天上三奇敢叙其事見於詠歌敬祝無疆之慶

天眷中興業丁年拱慶基皇圖開一子寶厯出三奇象
奏前星瑞光依太極儀一卮眉壽祝敬和益公詩

立齋游山不能偕次遁澤韻二首

色動山行約令人憶舊遊地形雖險易坤道自剛柔
路遶岩頭石烟橫洞口舟十年塵土夢此志幾時酬

山人真漫浪隨處得清遊雪瀑方爭勢風雷不肯柔詩
光浮玉板酒灩瀉瓊舟一枕斜陽裏清歡各自酬

題屏岩詩卷

有偉屏岩稿溫淳擷衆芳波瀾雖未濶骨骼已先張盡
掃江湖氣且無蔬筍香若參詩本旨却恐費商量

台山周詠道別五年因詩寄借韻以謝二首

邂逅松齋日曾知學共程心期千古遠世味一毛輕孰
謂睽離久猶垂故舊情何時風月夜得共揮文盟

中處乾坤大同時總弟兄行藏雖有間道誼豈無情欲
向忙中定先須靜處精光陰如電走慎勿驚虛名

題徐觀之字說

堂堂一鑑懸萬古光潏灩彼自有盈虛我要無虧欠陰
稜不能蝕塵埃不能掩只於事上觀足為操舍驗

舟中和葉聖子三首

雲欲回風勢先埋逼曉山催程推路險破冷覺杯慳帆
腹欣初飽篙師相對閒卧聞嚴子瀨只在片時間

桐江波漸滑霽色午方開香火巖蘭若烟霞老釣臺
高微徑險水轉萬山回欲訪先生裔相從買一杯

江濶風帆急潮回沙露痕寒林無剩葉茅舍各成村
雁落烟波渺鴉歸野色昏未知孤客棹今夜泊誰門

野興

文字飢難煮為農策最良興來鋤曉月倦後卧斜陽
秋稼連千頃春花醉幾場任他名利客車馬鬧康莊

題效奇

未識效竒處得於詩卷間屋邊環翠竹窗外即青山月
向女牆過煙凝老樹間不緣心匠巧何以發天慳

題適莊茅亭

屋角園雖小幽深隔世塵杖藜時自適杯酒樂天真松
磴規模古茅簷日月新閒花三十種相對四時春

和趙師日韻二首

佳士溫其玉相親意豁如窓前千个竹燈下一編書交
道無窮達人情自密疎清風明月夜或可訪吾廬

我生無燕頤四壁笑相如門巷堪羅雀燈牕且讀書老
來心事懶貧後故人疎尚有多情月時時到子廬

水仙

翦葉葱偷巧冰蕤獨耐寒梅兄雖有伴簪弟不同看山
谷詩猶在逋仙影不單玉纖捧金觥誰遣慰儒酸

瑞香

呈外來香國瓊敷四出葩嬌姿不受暑睡思却便茶心
裏藏金粟枝頭簇紫芽長安厭歌舞還肯到儂家

蘭

早受樵人貢春蘭訪舊盟謝庭誇瑞物楚澤擷芳名蒼
玉裁圭影紫檀含露英奚奴培護巧苔蘚綠菁菁

梅影

梅花已清絕明月忽橫窓孤影知難並羣花已豎降淡
痕開畫帳皓色掩書缸寂寞素娥冷須臾擁去幢

自述

身坐衆香國蒲團詩思新一貧雖累我此興未輸人陋

巷誰為侶寒窓不染塵
五言盟四友筆下頓生春

過故家有感

衣冠零落久今日事堪傷
厨起青煙薄門闌白日長
殘梅歌古道枯柳卧頽牆
山色依然好興衰未可量

過白鶴寺

小泊古蘭若雙櫺發舊柯
山光浮夜氣柳色媚春波
僧類胡孫瘦農師盜伯多
野人時問我新守政如何

晚興

卷二
散髮風簷下沈沈日暫曛鷹拳擒野雀蛛網獵飛蚊
羣鳥能為計吾生亦謾勤塵緣難著眼晚興寄青雲

新愁

愁逐西風動伶俜祇自憐家貧日累重學陋欠師傳
白髮還生矣青氈尚杳然高山流水調何日奏朱絃

題蟄菴

一蟄了千悞心安境自寬軒昂就收斂自在覓艱難
龍怕烏臺勘人疑蕙帳寒欲知舒卷意編簡靜中看

題寧庵

寂寂鐘魚冷松楸蔽杳冥雲侵晴路濕衣染晚嵐青天
未生人物山應銷地靈何祠香一瓣遺恨滿空庭

宿倍儂店感舊

諸老皆仙去遺蹤歲月深主人今易姓客子亦傷心來
燕傳新語群蛙試闌音欲將興廢事歷歷問雲岑

宿仙山浸碧軒二首

冒黑投精刹呼燈讀舊詩平分禪榻穩共聽雨聲馳魚

鼓催行色溪山挽故知人生萍聚散後會復何時

浸碧去崖谷琅然語夙緣水雲藏定力霜雪護華顛漸
喜虛形槁祇求實行全曾隨癡鈍子當已得心傳

遣興

初向坡頭下風霜入鬢毛味長濡竹簡燭短沃蘭膏家
與人俱瘦年隨氣轉高朱顏無藥駐臆下勿徒勞

催雨

人世如居甌驕陽不可鉏未聞芻作狗安得夢維魚賦

斂生民槁干戈國計虛安危關一飽雨意莫躊躇

喜雨

滄鬱雙雲合霧霓一雨通新涼驅積暑喜氣薄高穹點
點含生意聲聲起死功田家雖少歉尚可及年豐

和汪元思喜雨韻

龍蟄金瓶小神驅雨陣斜建瓴飛素練走澗舞生蛇風
使開雲磨雷香隱砲車農人有驕色一飽不須賒

題挹膝庵

一室方方丈名標挹膝新有書宜勘古無學可留賓靜
坐神明固清談滋味真傳家名刻在長對草廬人

冬至和適莊即事韻

跛躄廢人事來投大士家清談半窓月澹坐一杯茶燕
豆來霜果鵲瓶浸蠟花葭浮絕一日芳思已無涯

七言古詩

汪功父聘石友

一片寒姿蒼玉質久作歛江秋水骨磨瑕礪垢飽風霜

袖手南遊來楚國我曾研破青烟痕露華半勾拖玄雲
文理細密溫而淳伯樂一顧空馬羣癯癯好古子汪子
雅有半面如舊情巧取豪奪俱不敢聘以厚禮強委禽
吉日良辰新勸駕絳帳交懽相慰藉斟酌洙泗闢紫陽
大義發越添聲價紫陽是渠森梓賢久矣驂隨輯墜編
會心不惜時磨研至理神授珠瑩圓我今贈君明堂一
柱金書墨霜毫冠帶來蟾窟褚先生者白而腴即日相
邀來覽德絃歌聲裏春光半淨几明窗風日暖四友參

前無間斷俛首循循而勉勉萬里一鞭途甚坦太極門
開初未遠

和叔崧檣花韻二首

清和景氣已非春午陰濃處延詩人一杯佳茗沃嘉話
粲然主禮羞繁頻洞庭手植清香發金粟銀須照膚雪
薰風十里漾芳思萬斛明珠剖胎月素華綠葉騷頌中
先生南國德橫空朗吟受命不遷屈對花不飲無慚紅
服包錫貢三千春為花著句曾無人顆顆珠璣香萬斛

薰蒸天地勾風蘋充實先生詩興發韻嚴不數陽春雪
龍蛇一紙開天荒琅然吟破夜光月炯炯后皇嘉樹中
精白任道言非空秉心高潔寄清賞世人只解歌春紅

贈葉綠澗

有客有客訥而腴手携數冊堯夫書八八從而之八八
四千九十六無餘小游軌革何足算大游九厄相乘除
太玄洞極亦無法更有司馬推潛虛茫茫古今四海濶
動靜禍福無能踰玉符金鑰竊元命自合抱道山林居

堯夫堯夫初不死精神炯炯先天圖元會運世未為密
一畫未畫元非疎自從泄漏加倍語便覺造化無工夫
吾儒更欲窮造化造化尤解窮吾儒且將餘法供劇戲
君識此意庶無需世人逐逐不知止誦詩還肯安心無

和立齋番君吟

日月星辰天之精山川草木地之文本乎天者既圓象
下者何不皆方形此疑千古不能決讀盡六經無異說
依稀子夏微有言譬諸草木區以別草木之間操孰堅

僉曰此君耐歲寒虛心直節表真勁窮冬大雪青琅玕
平生正坐一圓累未堪全德君子比內圓猶是智之餘
外圓無乃德之耻我聞楚東有雲仍生來氣骨青稜稜
觚哉觚哉出乎類長大益覺廉隅分自從大學悟絜矩
四面正直各得所獨秉重坤六二爻斯可以為民父母
厥初受命莫不然世衰俗弊失其傳商周之際斯為盛
孤竹二字何曾圓

再詠菴易方節士

博物君子識鑑精包羅錯綜能成文夫何吳興戴慶豫
慨然譜竹擬諸形非草非木言甚決品類繁夥難盡說
九江五嶺多逸遺維此方君更無別隱彩輜名志行堅
萬里臨邛族最寒文饒携來甘露寺聲價壓倒萬琅玕
眼節鬚牙如積累四面對出莫與比不有芝田紀錄詳
後世莫知深可耻我聞此說亦相仍未嘗親得見觚稜
江東使者返行部招來節士番中分个个折旋皆中矩
什什來歸敬岩所有斐良朋保歲寒凜然如對齊充父

后山居士知其然心事曾將詩句傳
老來不復人間事
寄語山翁莫削圓

和立齋蠟梅韻

蠟花檀暈香如梅攬號入譜名京
垓立齋形容消息大
濃芳不受霜雪埋疎影橫枝雖未足
淡淡中色攬先開
薰然不待詩料理詩人無奈清香催
詩清香韻兩奇絕
詩香相感從何來只緣人與花相似
心香洒洒俱無埃
坡公衣鉢何敢晚
簡齋香酒非吾裁
有時靜聽群兒讀

繞樹日走數百回仰賴生意已如此俯視百草方枯黃
和立齋喜雪韻

生意原原如襍積陰閣陽開有緇尺風霜冰雪豈少思
到此自宜天地塞凜然帝則亘古今此外不知還不識
連年冬令太陽遲君子憂時長皺眉萬物驕矜不自持
落盡牕前年後梅深山芽茁無空枝更疑麥隴青離離
一夜風號陽氣伏玄冥奮威正當局翦冰栽花兩日飛
更撒珠璣三萬斛攬柄收權應恨晚明朝已迫東方木

却恐春風未肯和顛倒天時難善俗

寄敬巖

泳飛堂前橘柚香
田田荷葉浮波光
主人攬轡度閩嶠
馳驅端為蒼生忙
天生人才不虛出
必使事與才相當
爾才綽綽有餘力
豈容袖手窺其旁
平生正坐嚴冷相
不解嫵媚相頡頏
前時固亦與國論
莫肯默默安周行
老子九百何自苦
艱難險阻須甘嘗
玉溪飢民昔嘯聚
至煩禁旅來張皇
繡衣彈壓甫三日
猩鬼屏蹟消叢篁

露布一語不自伐猶有忌者羞回韁今年玉節蓮峰下
約東海若無驚鯢頗聞屬郡微有警往往鹽子多陸梁
此輩未易以柔服必至腥血膏鋒鉞由來受病非一症
莫將已效誇良方規模貴濶謀貴密當以虛心來衆長
局面布置要合節自有勇士爭激昂堂堂元老熟戎事
幸甚赤烏歸故鄉豈無惕然桑梓念囊底餘智應恢張
同心相濟一堂上誰兵誰將誰于糧不然牋天啟壇鉞
老熊當道驅群狼甲兵錢穀亦分內事機掇出真難量

豈予所至輒多事
老天驅入功名場
橘柚黃時聽好語
綠綈四輩催歸裝

題魁星

天樞之宿為貪狼
引領三台朝帝旁
典司多士擅文場
名在第一聲播揚
因此冰炭癡兒腸
彷彿肖象祈流光
題定武蘭亭副本

玉華末命昭陵土
蘭亭神蹟埋千古
率更搨本入堅珉
鹽帝歸裝投定武
薛家翻刻愚貴遊
舊石宣和龕御府

邊塵橫空飛渡河中原荊棘穴豺虎維揚蒼茫駕南轅
百年文物不堪補紛紛好事競新模傾歆醜俗亡遺矩
如今薛本亦罕見仿佛典型猶媚嫵清歡盛會何足傳
右軍他帖以千數託言此筆不可再慨然陳迹興懷語
今昔相視無已時手掩塵編對秋雨

和易岳兄芙蓉吟

天專肫肫分四氣曜靈西征駕新霽人間萬寶告成時
白帝疇功有良貴后皇嘉惠放一頭蜺旌鸞轂恣晨游

蜀錦步帳數千里爛然一抹眼波流玉容沐露月梳曉
翠袖踈蹊舞微笑雲舒霞捲競芳穠照水迎風為誰好
水中木末眩騷人拒霜宜霜名字新平生不識春霄暖
甘隨青女嫁花神易岩胸中五千卷景物驅歸句中鍊
賞花不是少年心見花依舊少年面石丁作主事難憑
子高那是夢仙瀛何如醉鄉自廣大幙天席地山為屏
詩魂醒處風光轉梅花已築受降城

用易岩韻壽易岩

天地之氣秋惟清清之極者為聖人惟皇降衷本均平
賢愚美惡氣質成有偉易岩萬人英聖涯涵泳心即經
人心道心惟一精怡然融洽萬理明矩度迥出風塵表
視履元吉祥素考義利兩關路分曉富貴功名何足道
一枝綠玉暢幽聲殷勤拜捧壽吾兄明朝西現長庚星
芒寒色正占千齡老而有子希世珍一念種出無邊春
他年頭角昂俊聲安車迎養雙朱輪

用適莊賜韻回祝

大椿蟠根雙幹矗秀色各分元氣足共占百五二十年
八千春秋從此卜西方無量不可思南華寓言不須讀
造化發育自無已天根月窟互相逐霜挾梅風夜推戶
日碾晴空曉烘屋冰輪載魄將再弦寶律浮葭欲飛玉
天公作意表弧瑞學子分題剡牋軸揆予受教自髭髥
歲月十分今已六我翁早出名利塵我翁天縱清閒福
眼明猶足察秋毫脚健不肯支筇竹友善堂前高揭扁
懿德道心新萬目人言腕力健於虎更須萬免供毫禿

不買駝峰換清供不買蛾眉歌壽曲歲寒兄弟歲寒心
敬和長篇侑醕酥

和遁澤武夷石乳吟

遁翁聲價為時重幾年勤學方繇統麗澤門人已寂寥
衣冠奕奕皆遺種當日詩編誰尚存遜齋今幸傳聞孫
平生工作風刺體近來琢句如春溫靈芽來自幔亭里
貯以紗囊紅與紫一掬槍旗分雅供七碗盧仝為驚起
鼎負古鼎親烹嘗清風習習生詩腸雲根不受塵土污

舌本豈帶臺閣鄉學海茫茫了無際一覺回頭有餘地
世味醲鮮多螫毒無味之中要精濟燕閒消息已全通
滿閣遺書須細窮澹而不厭真雋永不在松風蟬眼中

薰風歌代壽節齋

玉麟堂上歌薰風周公分陝方居東蜺旌龍節更號令
長江萬里消狼烽橐鞬帕首多名將夙興拜舞占乾象
紫氣浮浮軫翼間宗星炯炯銀潢上甫申飛下鼎湖山
汝陽天人未足言八紘納納入經濟一柱岩岩久具瞻

咎堯陪京新命尹虎踞龍蟠壯根本關中鎮撫必蕭何
北門筦鑰須冠準運量恢恢妙轉旋一念體國心通天
璽書錫勞下閭闔珥貂十革來傳宣天子令聞洽四國
令儀令色山甫德江漢湯湯告厥成袞衣歸兮式百辟
薰風薰風自南來解民愠兮阜民財不賡殿閣微涼句
拜手喜起明良哉菁菁葑菲公猶采世沐恩波深似海
春風一鶚又橫空敝帚蕭騷價千倍翹材油幕羅群英
壽觴潋灩難同斟客星灘頭頻鵲首夜夜遙瞻南極明

和遁澤惠豆粟韻

民曰同胞豈異根萬殊皆自一本分燒其春粟不忍聽
詩翁感慨何憂勤我有兒拳蓮實中共房齷齪笑秋風
平鋪春色殷勤種終鮮他年又怨公

秋深萬物盡歸根五穀從來不解分以長而食了無事
南山有種何曾勤遁澤真情在句中薄俗三歎曹劉風
識得異形同一氣應無管蔡怨周公

題平心堂

洛龜圓文錫神禹箕子陳範畀周武九疇自天倫既叙
嚮用一以壽為主人富貴何足數最要康寧安厥處
爾其好德全付予惟皇之極必福汝君侯有德存此心
居官居家堂兩銘強弱人已無留情湛然方寸如砥平
諄諄庭鯉雙趨庭指此良方垂後昆信受奉行不敢輕
宜爾子孫皆千齡

和叔崧春寒韻

知和而和當有節節貴得中忌超越造化神機豈易窺

天上不知誰理燮東皇面目似非真我聞四時皆有春
春來天地已交泰肅肅群陰豈可伸金谷笙歌未嘗吟
莫張威勢嚇詩人

題東邨所藏宮錦圖

后德相成帝業昌不耽歌舞誇新粧六宮婦式頒蠶事
職雅心專清晝長忽見雙娥理絲把寬急對牽身勢強
轉輪飛轉一縷細文茵獨坐迎微涼高捲翠簾三四侶
織就五采成龍章獻功不闕出宮閭手授縫人成帝袞

端拱明堂萬國朝文物聲明光四境何人遇此一段奇
追記丹青描不盡器用鋪張規制精默寓經綸合繩準
世間畫手無此圖疑是當年閻立本

賦雙松堂

和平堂前列四皓雙松為主雙檜宿深山大澤不肯住
鞭霆駕雨來重闥蒼髯梳風音瑟瑟霜皮凝雪冰鱗鱗
靜有精神觀世變悄無顏色阿綏紳朱幡皂蓋幾來去
丹楹藻梲方更新魏武子孫敦夙好十八公子忻相親

世間靈物妙難測一氣常存天地仁巍巍堂下萬休戚
左右冷眼時笑頰或然一念私欲勝垂垂二老能相嗔
起居出入知所敬願言共保千千春

侍伯兄宿履菴即事呈本老

朔風蕭騷霜正濃追隨雁影來城東樓閣寶門八字啓
一超徑入青蓮宮老師槌拂活潑潑臨機一喝開盲聾
舌根拖地無死句何曾一字粘虛空管帶忘懷聞妙義
豁然暗與吾道通諸方善人忽聚散黃昏方打齋時鐘

明極堂前吞箇棗畫灰鑪畔捉條龍須臾八萬四千偈
盡在蒲團默坐中

拍手行

五雲縹緲護天闕輦金輦寶來如山上有封題三道印
多是中朝清要官一膏一縷盡民命荆筍新痕蝕舊瘢
東麾西節步霄漢公私亦立生意慳年穀豐時無盡藏
那禁水旱相摧殘黃馘槁項卧溝壑權奴狼子生狂貪
輟耕太息鴻鵠志乘牛讀史需時艱忽如妖禽嘯清曉

泥丸初不勞驚彈何人把玩張聲勢直令聚蚋奔醢酸
竹兵烏合本兒戲伍籍久蠹心先寒吁嗟身世狹於掌
北望神京雙淚潛國家有紀誰敢犯濟彼德惠防民姦
何曾假借汚暴手病入心膂何時安堂堂正氣不久熄
自古東南多造端誰出華山拍手笑袖中三尺山河寬
七言律詩

和碩夫兄五松韻

重開甲子舊年華莫問行程差不差幸有數杯澆舌本

不須一筆鏤心花歲無顰雪非人福時到春風不我賒
兩手托天原有氣簾瓢陋巷也為家

蜀葵韻

亭亭弱幹裊新涼露浥精神導太陽紫粟綠房醫士寶
黃裳紫袂道家粧宗華衣錦趨炎晝蜀本鎔金耐素傷
千古無人歌實德騷人只解逐餘香

和秋澗惠蘭韻

竹蘭臭味古來同同處無非造化工墨竹方生秋澗上

紫蘭已到魯齋中
築臺移玉尊
清惠運筆揮金尚古風
却似高人來伴我
幽芬日日透簾櫳

和得全喜雪韻

天道流行自有經
一冬常燠大無倫
臨期飛雪粗成冷
只隔明朝便是春
窓外曉山高積玉
夢回夜月更鋪銀
玄冥恰似輪臺悔
改過雖新已悞人

瞻彼西山紫翠間
百年遺族備艱難
一區濟濟雖孤立
萬物原原得舊觀
舉世莫知黃髮貴
何人肯伴白雲寒

相將共折長亭柳況是殘梅已著酸

贈吳賊

襟佩青青白面郎未成佔畢已飛揚深嫌實學規模拙
只把時文日夜忙志氣崢嶸謀富貴身心荒落敗綱常
他年窮達皆無據却笑儒冠誤可傷

和遁澤喜雨韻二首

久欲飛山試笋車避炎情緒未能嘉讀書有道調心馬
製藥無方遭睡蛇天地秋來催祭鳥池塘雨過鬧私蛙

病夫推枕幡然起骨健神清眼不華

葉下亭皋半月秋風飛雷厲起雲頭一奩返照收林樾
萬派飛泉響澮溝放鄭賢侯初下令乞靈拙士未能瘳
吾儕且說維魚夢那問驅車相國愁

和易岳蘭菊韻

小春天氣未和平冷暖於人孰重輕幽菊瘦蘭皆有味
淒風楚雨自無情披來破衲便身穩寫到新詩徹骨清
箇裏不知誰得失薰蕕境界要分明

和易岳雪

豐年嘉瑞有根原
碎剪銀河到底懸
古有諸侯延辨孟
今無令尹訪飢袁
狺狺犬吠思騷楚
茂茂貞松記漆園
險韻忽拈真寡和
茶烟起處屈高軒

八詠新樓

羣飛高插女星光
可是溪山屬沈郎
眼力拓開千里遠
樓身擡起一尋強
爭觀王謝新題壯
不數齊梁舊事荒
誰識倚闌真樂處
清風明月朗篇章

題康湖偉觀

蒼翠雄盤一古村新樓面面納乾坤陰晴朝暮天容變
開闔榮枯春意存萬壑精神融寶鑑千峰氣勢拱端門
松楸冉冉白雲下一醺寒泉罔極恩

和易岳首夏韻

垂老東君戀舊寒惜春情緒正孤單哂他功業傳千古
還我詩書博一安芍藥階前風味淺醪醕架上典型殘
勒回春色憑詩句生意津津上筆端

次前人韻

彈冠事業耳邊新我夢何因到紫宸自古為仁知不富
如今學道豈憂貧與其鞭扑胥民髓孰若簞瓢樂此身
志士不忘在溝壑不應後世便無人

寄立齋

團欒未久又分襟踽踽嫠嫠老不禁陋巷更無佳客語
殘編幸得古人心熙熙農父含生意濟濟官寮喜德音
欲共功名須好漢微陽何以勝重陰

春歸

春來春去果何心
靜坐焚香細細評
太極流行千古事
一元發育四時情
黃堆稼穡誰勲業
綠到桑麻已老成
舒慘榮枯人自異
此中生意本分明

舉業有感

後世求才術太疎
三年三日判榮枯
消磨歲月莫知老
奔走英雄不覺愚
與死為隣猶未已
雖生闕如無
聖門反在揶揄內
何敢忠言請改圖

和道澤初夏韻二首

萬古南薰與舜同
何時吹入五絃中
百年喬木支秋嘯
一旦新萌長露叢
世事漸如宣子曰
詩情猶有大王風
來年綠泉新勲業
更有何人詠大東

深深陋巷更深藏
鞭線曾無一寸長
學問不宜隨苟且
傳聞何敢喜張皇
一池科斗書千古
滿徑風騷竹萬章
此意寂寥誰與共
美人只在水之陽

重題八詠

樓壓重城萬井低，星從天闕下分輝。
傷心風月詩應瘦，滿眼桑麻春又肥。
山到東南皆屹立，水流西北竟同歸。
倚闌莫問齊梁事，斷石淒涼卧落暉。

和易岳喜雨韻

轉移剽暑若艱難，誰謂炎涼反掌間。
狐鼠就擒元憤鬱，旄倪相慶便清閒。
雨聲恰似政聲好，天意翻嗤詩意慳。
一飽所關誠大矣，吾儕安得不開顏。

歎煩一轉亦何難，只在邦君念慮間。
社鼠城狐方就繫，

土龍芻狗便投閒
平時真見天人密
順處不疑霖雨慳
夢裏忽聞風力猛
定知千里破愁顏

送馬秋山寄友人

赤城千古一東湖
誰肯重開太極圖
要得斯文傳氣脉
定須吾黨立規模
聖賢不盡七分易
天地長存三字符
念念服行方是學
莫將枝葉費工夫

用前韻答車玉峯

人物如君屹鼎湖
高山仰止我儀圖
講篇損益開新式


略紀刪修有定模目斷交情殊恨濶心涵古道若相符
去年不客東湖上幾失人間大丈夫

題涵古

梅花之外竹扶疎矮屋明窓著此癯生意多從閒處見
天機却向語中枯通身總是先天易開眼無非太極圖
點點若知河洛意庖羲豈有古今殊

平生意廣奈才疎學未成時家已癯蚤慕滄洲窮廣大
晚依麗澤沃焦枯先儒凜凜今如在聖道洋洋孰與圖

兩字高題時仰止千江一月幾曾殊



魯齋集卷二